



HAL
open science

A spia

Christophe Luzi

► **To cite this version:**

| Christophe Luzi. A spia. 2017, p. 3-8. hal-01682386

HAL Id: hal-01682386

<https://hal.science/hal-01682386>

Submitted on 14 Oct 2021

HAL is a multi-disciplinary open access archive for the deposit and dissemination of scientific research documents, whether they are published or not. The documents may come from teaching and research institutions in France or abroad, or from public or private research centers.

L'archive ouverte pluridisciplinaire **HAL**, est destinée au dépôt et à la diffusion de documents scientifiques de niveau recherche, publiés ou non, émanant des établissements d'enseignement et de recherche français ou étrangers, des laboratoires publics ou privés.

A spia

(parti prima)

U sei d'aprili di u 1814 in Fontainebleau, l'Imperatori adunò i so marisciali. Cun calma cuntò i so forzi militari. Annantu a carta di l'Europa, spiecò à i so affidati com'eddu cuntava di batta in daretu. A dicia, era convintu di rivultà à u puteri. I marisciali ùn anciavanu. Napulioni l'intarrugava unu apressu à l'altu. S'eranu concertati. Dicianu ch'ell'ùn firmava più chè bricioculi d'armata, ch'ùn c'era più spiranza. A Francia vulia a paci. Cuntinuà di luttà pruvucheria a guerra civili.



L'Imperatori gravamenti si calò è scrissi : « i putenzi alligati avandu pruclamatu ch' l'Imperatori Napulìu era u solu ostaculu à u stabiliscimentu di a paci in Europa, l'Imperatori Napulìu fidu à i so giuramenti, dichjara rinuncià par eddu è par i so eredi, à i so troni di Francia è d'Italia, à i so raghjoni, è ch'è tuttu sacrificiu fussi ancu puru quiddu di a so vita, hè prontu à fà lu par a Francia ». U tradimentu di Marmont, l'eguisimu di i so tinenti, l'avianu acciacatu. Qualchì ghjornu dopu, Napulìu partì da Fontainebleau.

In istrada versu l'isula d'Elba, seppi ch' i truppi francesi, spargugliati in Olanda, in Italia, in Spagna, risistianu sempri. Carnot difindia à Anvers, u ghjinirali Maison avia dodici milla omi pronti in i Flandres. Davoust cù quaranta milla omi assicurava i so pusizioni à Hambourg. Geniu di Beauharnais dava capu in Italia à i suldati di Bellegrade è di Murat. Soult si n'era ghjuntu oramai à l'orlu di Toulouse. Suchet era sempri in Catalogna. In ogni locu, u populu, i suldati, tutti li eranu fidi. Tutti eranu pronti à mora par l'Imperatori, assaltata a so mimoria da milla ricordi appassionati, è tinendu si à menti cun invidia è cun superbia, un passatu fervidu di glori è di battagliai.

In Piazza di Gavi, piccula città di a fruntiera taliana, Napulìu avia stabilitu un omu di cunfidenza, toccu trà i so più fideli partigiani da i raghji di l'anima impiriali. U cumandanti Poli era natu in quiddi vangoni di U Sulaghju, versu Muchjalba, u prima d'aprili di u 1767. Senza soldu è cun pocu pani, era crisciutu in issa aspra righjioni di u Fium'orbu, carca d'una falza simbianza di paci è di tranquillità. Abbandunati muchji, scopi è arbitri ch' li avianu nativamente scunvultu un attracciu rusticu, fattu di meravigli ma ancu di i suffranzi grevi di a vita, s'inrulò à quindici anni in i *cacciadori*. Da u 1786, l'incurpuronu in u righjimentu di u Riali Corsu. Bernardinu Poli era statu fattu capitanu in u battaglione di u Liamoni quandu spusò in 1808 Maria Faustina Tavera, a figliulina di Catalina Ilari ch'è era a balia di Napulìu.

L'Imperatori avia tinutu à battizà à Maria Faustina, era u so cumparu. U cumandanti Poli ricordava cun piacè a cura ch'eddu avia Napulìu par a figliola di a so suredda di latti. Spusò, com'eddu dicia, a so figliana, ista figliana ch'eddu tinia cara quant'è u so figliolu. Un ghjornu

à i Tuileries, annuncionu ch'edda ghjunghia a signora Poli di Corsica. L'imperatori s'avanzò, è presi a zitedda corsa par a mani : « Signori, diti mi avà ch'edd'un ci hè in Corsica beddi donni ! ». U cumandanti aghjustò : « noi altri isulani, guardiani di i tradizioni d'una volta, ci accadi sempri di truvà indè i nostri mogli, una divuzioni senza fallu. Hè rara ch'eddi ùn ci si mettinu à fiancu in lu periculu, ch'istu vigori maschili venga da l'educazioni purtendu i solchi gravi d'una vita dura, o da u timperamentu naturali di u sessu. In istu paesi duva c'hè più timori chè in altrò, ch'ùn sò l'ori cusì schietti, a stumachiccia ch'edd'anu in certi casi, mostra in modu sicuru chè i donni corsi, s'eddu ci voli, quandu subudoranu a disgrazia di cosi à eddi cari, facinu d'aspri suldati. Ùn vi parlu di a signora Poli ch'ì mi suvitava pidioni, ch'ì francava i fiumi, ch'ì durmia di notti annantu à i panculi, è purtava u muschettu à l'armu maniendu lu à u casu ». I donni corsi avianu mustratu u so curaghju in i guerri d'indipendenza di u Fium'orbu, è a mamma di Napulìò cuntava ch'ì zitelletta, cun piacè accumpagnò senza angoscia in gola u so maritu à fà guerra. Scorsa a disfatta di Ponti Novu, s'era ritirata cù un gruppu di partigiani in i falatoghji di Vizzavona, poi avia pruvatu d'organizzà a resistenza in Niolu, è s'era quasgi annicata vulendu travancà u Liamoni à cavaddu allora ch'edda era tandu incinta di Napulìò. Filendu u so discorsu a moglie di Poli s'attraciava nantu à l'usu di a donna corsa. Duvia in u periculu ed in certi situazioni, quandu fiasca a parolla ad appacià i spiriti, sparta cù maritu i risichi di a lotta. È quali più ammanitu ?

A piazza forti di Gavi era in boni mani. Quandu di dicembri 1810, dopu passatu un annu in u grandi ducatu di Toscana, u cumandanti Poli fù numatu à testa di u forti di Gavi, li trimulò u cori d'amarezza. Stu rollu ch'eddu duvia tena nantu à l'eterna paghjina di storia ch'ì allora scrissi Napulìò, era certu d'impurtanza strategica. Ma l'Italia era luntana assai da a guerra è à Bernardinu Poli li brusgia scretamenti in pettu, tal'una deda ficcata in cenara, l'anima suldaticcia. L'imprimava pocu l'aristucrazia genuvesa è i so maneri finti. Gavi era una città di sei milla abitanti à u cuntornu di Genuva. Forzi ùn era tantu luntanu di i consuetudini di i so antenati. Spampiliulavanu ancu li stessi steddi in celu culà chè in Corsica, sopra à u so paesi nativu. Ci si truvava muchju, rosumarinu, linsticu, ficu d'India, ghjinestru, arbitru, murtulaghju. Crosci d'una acquata matutina, curianu da monti à mari nantu à i fallatoghji, i buschetti scuri di l'alivetti, poi quiddi verdi di l'arancetti è di l'amandulaghji, incucciendu si in u so giru tutti i fiori più beddi è più bramati di u Mediterraneu. I sbuchji davanu un aspettu d'esutismu à tutta quidda parti di a costa liguria. Casamenti magnifici scalinati nantu à i rìpi, facianu à quandu vinutu l'istatina, u sughjornu pridiletu di ricchi niguzianti genuvesi.

L'uffiziali francesi, tinuti quant'à eddi in palma di manu, pigliavanu parti ad ogni festa, ogni baddu ch'ì tandu si suvitavanu senza nisuna intermittenza da Genuva à Gavi. Si baddava in quidda piccula città; in altrò si faccia a guerra. In Ispagna, scuppionu à murtoriu i voci dulurosi di l'indipendenza, cù un fanatismu ed un curaghju sopra umani : par Diu, par a Patria, par u Rè, ch'eddi briunavanu. Napulìò cridendu d'avè sradicatu a resistenza, dicisi d'arrucchià u Rè Ghjiseppu versu Madrid. Era statu ubbligatu di metta à cura di i maresciali a so armata, ma issu populu spagnolu ùn era ancu prontu ad essa pacificatu. In u 1810, ùn c'era un branu di risultatu. A ghjilusia arrabiata di i ghjinirali, i so abbutinati, u pocu d'auturità è d'arbitriu di u Rè Ghjuseppi malgradu una strada scelta, fecinu ostaculu à tutt'azzioni dicisiva à tal' puntu ch'ì in u 1812, l'armati francesi ùn pudianu più chè rinculà. Un

mischiu d'armata, di spagnoli è d'inglesi arrimbati sottu à u cumandamentu di Wellington, faccia vittori impurtanti. U 22 di lugliu di u 1813, Marmont, chjappu in a piaghja di Arapiles, fù ben' fertu è a so sguarda malminata. Ghjiseppu si n'andò da Madrid è l'armata francesa fù disfatta in Vittoria. Wellington assaltava quidda di Soult chì si ripiecala à Saint-Jean-de-Luz poi à Bayonne, è infini à Toulouse in u 1814.

D'altrò i nutizi di Russia eranu gravissimi. L'Armatona di Napulì, senza avè persi canoni, senza mancu essa stata scunfita ind'una battaglia una volta sola, avia culpitu i so più grandi disastri. Napulì era partitu da Russia cun pressa par corra in Parighji dopu a cospirazioni di Mallet. Murat incaricatu da l'Imperatori di cumandà l'Armatona, abandonò u so postu par timenza di perda u so tronu, è vultò à tutti frulli in Napulì. Poi funu Lutzen è Bautzen, a vittoria di Dresdes siguitata da Leipzig, a famosa battaglia di i Nazioni. Napulì ùn avia mancu più un alliatu. Ancu Murat in Italia, avia finalamenti arrivatu a Cualizioni. Ultimamenti succidò a campagna di Francia, marchja vitturiosa chì feci rinclà l'armatuccia di Marmont, Victor, Mac Donald è Ney. Poi ghjunsì a ripresa di l'Imperatori : Champaubert, Montmirail, Montereau, Vauchamp. Si succedonu i vittori com'è tandu in Italia. Era l'attaccu addispiratu, l'ultima scossa di Napulì è a so ultima fortuna. Issi vittori funu un veru sciempiu umanu. A ghjovana guardia imperiali sdrughja com'è nevi à u soli. Era à Fère-Champenoise induva Mortier è Marmont si facianu batta è aprianu à l'armata numica a strada versu Parighji, chì ghjunsì a so capitulazioni malgradu u so sempiternu ingeniu.

In Gavi u cumandanti Poli, à for'è à misura chì li ghjunghjanu i nutizi disastrosi di a trapughjata di l'Imperu, s'era purtatu in odiu. Ùn patia più d'ùn pudè agiscia. Stintosu dumandava à parta cun l'Armatona, induva si dicidianu l'affari di statu. Ma l'Imperatori li feci dè chì Gavi era a so piazza. Bernardin Poli ci cunsintì... è tutt'in un colpu, l'avenimenti si pricipitedinu. S'affaccò u timpurali quandu omu ci s'aspittava u menu.

Murat imparendu chì l'alliati avianu francatu u Rhin, ùn avia micca esitatu ad appughjà si à l'Austria par mantena si nantu à u so tronu. L'undici di ghjinaghju 1814, fù signatu u trattatu trà a corti di Vienne è quidda di Napulì. Cù issu trattatu Murat s'ingaghjava à fà si scunquassà un armata di trenta milla omi à l'Imperatori. In cuntraparti, l'Austria li assicurava u regnu di Napulì, è li lasciava i so pieni diritti in Ancôme è in i marchi papali. Fù ratificatu issu accordu inturbiditu u 4 di farraghju : subito Murat si mossi è ghjunsì in pedi à i muri di Plaisance. In issu fattu u vici rè, Geniu di Beauharnais, ùn era più in statu di sustena l'attaccu contra u marisciali di Bellegarde. Si ripiecò versu l'Adige. In vanu Napulì avia pruvatu di ricunducia u so cugnatu. L'avia ancu minaciatu : « seti un bon' suldatu nantu à u campu di battaglia », li avia scrittu, « ma aldilà, ùn aveti nè vicori, nè carattaru... supongu ch'ùn seti micca di quiddi debuli chì pensanu chì u Liò hè mortu ? Sè vò feti issu calculu, saria un sbagliu tamantu. M'aveti fattu tuttu u dispiacè chè vò mi pudiate fà di poi chè vò seti partitu da Wilna. U titulu di rè vi hè cuddatu in capu. Sè vò vuleti tena lu, inviniti vi ni bè ». Murat sperava essa rè d'Italia, è feci orechja marcanta à Napulì.

Sia ciò chì sia, a fruntiera di u sudesti era invasa. I pusizioni d'Albaro eranu pronti à ceda. U numicu era oramai à trè ghjorni di Gavi. U 15 d'aprili di u 1814, u cummandanti Poli ricivia da u ghjinirali baronu di Fresia, l'ordinu di metta in assidiu Gavi. Da issu ordinu ricivutu, Poli

capì. È issa situazioni l'impinsiria. I dispacci mustravanu u scuncertu di i capimachji. Nimu avià vulintà o murali. A piazza d'armi di Gavi ùn ricivia più pruvizioni. I truppi eranu senza u soldu. U cumandanti Poli ùn si lasciò accascià. Pruclamò l'assediu è dicisi di risista fin'à l'ultimu. À issu mumentu, seppi chì l'alliati eranu intrati in Parighji. In u stessu tempu, ricivì una lattara da Fresia, infurmendu lu chì Genuva sarebbi evacuata u 3 d'aprili, dopu signata una cunvenzioni trà i ghjinirali di a So Maestà d'Inghilterra.

« I truppi si stradanu versu Nizza », dicia u ghjinirali Fresia. « U forti di Gavi, vistu a so situazioni geografica, pudarà risistà assai, è vi grateghju eiu d'essa piazzatu cù più fortuna chè me ». Prestu ghjinsi sin'à Poli l'annunziu di l'armistiziu cunchjusu frà u rè di Napuli, u marisciali Bellegarde è Lord Bentinck, intimendu « à tutti i capi di battaglioni d'armata, è i sottu divisioni militari di accusenta à i grandi avinimenti chì s'eranu passati in Francia è d'inarburà un distintivu biancu ».

U cumandanti Poli presi tutti i cumunicazioni cun Genuva, s'impussissò di parechji trasporti, assicurendu si par parechji mesi a pruvista di u forti di Gavi. Lord Bentinck tuttavia, bramava quant'à eddu ch'ùn ci fussi cumbattitu. Parlamantari funu mandati à u cumandanti Poli, par mustrà li chì a so resistenza era inutili è li si feci ancu ufferti splendidi. U cumandanti risposi ch'edd'ùn renderia a piazza di Gavi chì sottu l'ordinu di l'Imperatori. Li fù contrapossu chì Napuliò ùn era più chè rè di l'isula d'Elba, è chì oramai u so rè era Luiggi u Diciotesimu. Risposi u curaghjosu ufficiali : « ùn cunoscu chè l'Imperatori ».

L'inglesi li mustronu i documenti, i ghjurnali. Fù indarru... « Chì n'aghju da fà di issi scartafaciuli ? Aghju ricivutu da l'Imperatori l'ordini di difenda issa Piazza. Ùn a rindaraghju chè sottu u so ordini. A bandera turchina bianca è rossa fluttarà in pendita di u forti. È par me tutt'altru segnu chè quiddu di Napuliò hè tradimentu ». L'Ufficiali inglesi capinu chè nudda ùn u faria ceda. Li pruposinu di disignà dui ufficiali di u so cantunamentu par andà unu in Parighji, l'altu à Porto Ferraiu à piglià l'ordini di u Guvernu, è assicurà si chì l'Imperatori ùn era più chè rè di l'Isula d'Elba. « Siasi ! », ripresi Poli, « ma l'avenimenti sianu ciò ch'eddi sianu, u cumandu u lasciaraghju sè l'Imperatori u m'intima da Parighji o Porto Ferraiu ».

Dui ufficiali si missinu da Gavi u ghjornu stessu par riempia issa missioni. Malgradu a cunfidenza ch'eddu mustrava u cumandanti Poli ùn s'inganava : « Ùn a sappia chè troppu, chì i Bourbon sò i maestri di Parighji, è chì u pricipiziu s'apria davanti à me. Di più a garnisoni in Gavi, cumposta da Pruvinziali, m'inchitava, ma u fattu chì a bandera di i trè culori fluttassi nantu u forti, u restu ùn impurtava ». A popolazioni di Gavi tinuta à currenti di l'avenimenti, s'inzergava chì l'ufficiali risistia, è ùn tardò à manifestà cun viulenza contru à quiddu ch'edda cunsidirava com'un ribeddu.

Poli intrateni in u so sughjorni in Gavi bunissimi rilazioni cù u merru Nasi. Era quist'umacciu un puliticu senza cunvinzioni, senza scrupuli, senza mancu cuscienza. Avia duminatu à Gavi cun terrori. Mustrendu i so posizioni francufili è à so divuziò à Napuliò, si ben' chì u so creditu ingrandava. Si truvava à capu d'una grossa ricchezza è di i più beddi attracci di a città. Quandu imparò l'abdicationi, vinì ad essa un partigianu feroci di u rè di Sardegna. Presi primura di riceva l'ufficiali inglesi, andò à veda Lord Bentinck par trattà a reddizioni di u postu di Gavi. Intra tempu faccia nichi d'essa amiconu cù Poli è li cunsigliava di ceda à

l'insistenza di l'Inglese : ùn ebbi nudda da l'ufficiali. Allora decisi di mostrà a so simpatia à u novu reghjimi inarburandu a bandera bianca à nantu à villa Cambiaggi duv'eddu s'era stallata l'armata di l'assedi. Era una di i più beddi villa di a costa, un veru palazzu cun assai opari d'arti. U maiori Brinstiel cidendu à l'insistenza di u merru, inarburò una mattina a bandera bianca in cima à u palazzu. Nasi era cuntentu di fà u colpu à u cumandanti Poli. Curiosu era di veda com'eddu a pigliava : a pigliò malissimu. A villa Cambiaggi era à tiru di canoni. Bernardinu Poli feci minà di punta dui canoni è una grandinata di palli s'abbattì nantu à u palazzu. L'ufficiali di Lord Bentick li mandonu un parlamentariu. I canoni tiravanu sempri. U focu s'arredì quandu a bandera bianca fù cacciata. Ma u bombardamentu avia scuncassatu a bedda prupità di u principi Cambiaggi, amicu intimu di u cumandanti Poli.

A pupulazioni avà era fissa. Poli ùn capitulava è piuttosto chè di renda si, faria saltà à Gavi è s'intararia sottu à ciò chì ni firmaria. Nasi imprissunatu da l'energia di l'ufficiali, feci finta di so rissentimentu è li mostrò un gran' curniami. Feci inversu è manera chì u cumandanti Poli li rifessi cunfidenza.

Chì pudia tema di più u cumandanti ? L'assedi era pruclamatu, tuttu u puteri era in li so mani. A guarnigioni sottu influenza di u so capimachja, era pronta à fà ciò ch'eddu dicia. Ma sì Poli ùn si misfidava, avia cun eddu una parsona ch'ùn si lascia coglia da i maneri vulpaghji di u merru, è chì sospitava i so trafunchjuli. Quattru anni fà quandu presi i so funzioni, u cumandu Poli ghjunsì cun eddu da U Sulaghju, una zitelletta di sedici anni, brunetta, lungarzina, faci linda, capeddi foschi d'ebanu, bedda bocca fini, labbri rossi chì li davanu una spezia di malincunia, ochji neri in amandula chì rispichiavanu energia è passioni. Si chjamava Anna Maria. A so ghjenti eranu pastori corsi. U babbu avia fattu a Guerra d'indipendenza, s'era battutu in u Borgu è in Ponti Novu. Dopu a disfatta di Pasquale Paoli, avia cuntinuuatu a guerra di partigianu in Niolu è in Fium'orbu. Poi à quandu finitu, rivinì in U Sulaghju, duv'eddu rifaccia tranquillu u pastori. Allora s'era maritatu. Avia una grossa famiglia chì campava annantu i terreni di u Cumandanti.

Quandu nascì Anna Maria, l'Ufficiali fù u so cumpari è a battizò. Quandu si n'andò à Gavi, a si purtò cun eddu. U cumandanti chì a tinia cara, l'avìa mandata à scola. Edda s'intindia d'essa com'è da a so famiglia. Facia i cosi di casa fida fidetta par u Cumandanti è a so moglie.

Avia suvitatu Anna Maria cun assai angoscia i fatti. Ghjunti cattivi nutizi, avia vistu i lacrimi nantu a faccia di u so protettori. Issi suffranzi eranu dinò i soi. Sintia chì forzi, u tempu di sparta i pericoli s'avvicinava. Sappia chì u cumandanti era capaci di fà un altu attu d'addisperu. Aspittava di veda lu un ghjornu metta u focu à a pulveriera par ùn abbassà si à renda l'armi, è u postu chì l'Imperatori l'avìa cunfidatu. Stu casu pudia accada, ùn si saria micca spavintata. In tutti maneri ùn faria nudda par fà à culu in daretu.

Saria, apressu tuttu un gestu ottantu eroicu chè quiddi fatti in i so paesi, durante a guerra d'Indipendenza. Ma ciò ch'edda ùn accitava, era chì u cumandanti fussi minatu di falsu in u scornu d'un carrughju, da un traditori, chì truvessi piaceri à mostrà u so attaccamentu à u Rè di Francia incù un attentatu contr'à un suldatu fidu à l'Imperatori. Era ciò ch'edda timia. Avia intesu parlà, sintia nascita ingiru i minacci. Omu ùn si misfidava di issa « francisuccia », mancu dubitendu si ch'edda capia u talianu, ch'edda cunuscia tutti l'astuzi di u parlà genuvesi chì

ogni Corsu capisci senza difficoltà. A u surti di a ghjesgia avianu sussuratu qualchi parsoni, ch'eddi n'avianu una techja di u vechju Brutuloni, è ch'è à mumenti ùn nuciaria più à nimu. À nimu parlò di a so paura, ùn l'avarianu stata à senta. Ma da tandu, suvitava u cumandanti pedi à pedi. Era dicisa à piglià i so pericoli, dicisa à difenda a so vita s'edd'era minnacciata.

È ùn s'era sbagliata. U 24 d'aprili, u cumandanti Poli avia da scuntrà u miaori Brinstiel in a vechja miria di Gavi. Di poi ch'è u cumandanti sfidò l'Inglesi, u maiori u stimava ancu di più è andava à spessu à veda lu. Par eddu a guarnigioni di Gavi ùn era occupata. Era cunvintu ch'è tuttu saria arranghjatu quandu Poli ricivaria i cumandamenti ch'eddi duvianu trasmetta li. Di fatti, facilitava u ravitagliamentu di a città è ùn u scumudava di parmetta à i campagnoli di l'intornu d'entra in a Piazza forti.

Una dumenica, cun tempu maravigliosu vininu i campagnoli mai sazi di nutizi, abundonu in Gavi. Incù i cittadini s'accattastavanu in i carrughji, discutavanu, accaniti di l'avenimenti, aspittendu cun pressa ch'eddi vultessinu i portanutizi di u Cumandanti. L'ufficiali francesi di a Piazza u si misfidonu, si sparsinu in i carrughji. U cumandanti Poli in casa a si pigliava pian'pianinu. Poi s'intendusi in ritardu par u scontru, s'attracciò in freccia versu a miria.

A mezzu à un cunvugliu ùn pinsava mai ch'è a tranquillita sighi rotta. Anna Maria era più pinzarosa è più misfidenti, com'è sempri. U suvitò in a vechja miria fin'à ind'edd'era Brenstil. Scugiurata par vultà si ni, intesi brea è brioni. I campani à marteddu sunavanu à murtoriu. A casa fù inturniata da l'omi di Nasi. U cumandanti era prighjunieru. Subitu Nasi, i so figlioli, i so nipoti, i so paisani intronu in u casonu à pistola in manu. Nasi tirò fora i nutabuli. Da a finestra di sopra a casa, infilò u populu, li dissi d'armà si è di sbarazzà si di Poli, di buttà si contru à eddu. L'ufficiali è i suldati francesi ch'è si tiravanu dui passi funu attaccati. Poli era cascatu in una ghjatta secca.

Poi spiecò : « l'assassini m'ingutuponu. Senza altra speranza chè di salvà caramenti a mo vita, i ricividi spada in manu, è mi difesi u megliu chè possi. Avianu chjusu l'usci. Fertu, addibulitu, pirdia u mo sangui. Ùn avianu più chè ad acciacà mi. Quand'in un colpu, l'usci funu sfundati da unu di i nostri distaccamenti surtitu à tutti frulli da a fortezza. Issi scillarati, buttati fora par li scali, andavanu à cuntà u spaventu à i so esecrabili amichi. I suldati, addispirati, vulianu par vindetta, scompia a città. I calmonu cun difficoltà assai. Infini a sumossa fù spinta. U sgiò Nasi scapedi è s'agruccò in un campu inglesu. Issa ghjurnata vidi mora qualchi parsoni.

Ciò ch'è u cumandanti Poli ùn dissi, hè da induv'eddu vensi u succorsu di a Pruvidenza ch'è u salvò. Sentendu u periculu Anna Maria corsi in a piazza, sunò u cornu, riunì i suldati sparsi in a furtezza. L'aviò à i corsi versu a casa cumuna, induv'eddi ghjunsinu à tempu par salvà lu. Ghjunsì a prima, è videndu l'ufficiali curaghjosu mezzu fertu, andò à dì la à madama Poli. In casa u cumandanti seppi ciò ch'Anna Maria avia fattu, li s'avvicinò è a basgiò : « s'è una vera fium'urbaccia, à parta d'avà sarè di tutti i mo mossi. A sò chè tu mi sarè un colpu di manu d'oru ».

Frà tempu u maiori Brinstiel, tistimoniu di l'attaccu ch'è risicò di toglia a vita à Poli, feci sapè ch'è issu tradimentu era par eddu indegnu. Incù u scopu di scarta tuttu cunflittu prupunì a

paci fin' à u ghjornu chì u cumandanti avaria ricivutu l'ordini di renda a piazza forti à l'Inglesi. U ghjornu stessu, ghjinsi a risposta à u scrittu chì Poli avia speditu à l'Isula d'Elba. L'Imperatori l'intimava di tena si à ciò chì si passava è di vena cun eddu in Porto Ferraio.

A so missione era finita. A guarnigioni uscì da u forti cù l'unori di a guerra. I truppi diretti da u capu battaglioni Roux s'arruchioni versu Nizza. Poli andò in Genuva. Ghjuntu ci, Lord Bentinck li dissi di vena à veda lu. U cumpurtamentu di u cumandanti di a furtezza di Gavi, a so fildeltà à l'Imperatori, u so curaghju, avianu imprissunatu Lord Bentinck chì vulia attaccà si un tal'omu. U ricivì com'un frateddu di guerra. Dittu li a so stima, li proposì di piglià serviziu in Inghilterra induva i so qualità è u so meritu sarianu veramenti ricunisciuti. Poli ùn ebbe cura di fà sapè i raghjoni di u so rifiutu : in nisuna manera ùn avaria ricusatu di rispondà à Napulì. Ancu sè in più, ùn amava i Bourbon, era francesu, è mai ùn accunsenterebbi di vesta si di pannu stranieru. Risposi à Lord Bentinck punendu li una sola quistioni.

- Signori, a Corsica hè sempre francesa o hè diventata inglesa ?
- Innò, i scritti a lascianu francesa...
- Allora, signori, ùn possu serva a So Maestà d'Inghilterra
- Eh ! ô cumandà ! serviriati i Bourbon ? Acceteriati a bandera à fior' di cigli ? Vò, vechju suldatu di l'Imperiu è di a rivoluzioni, serviriati dunqua i Bourbon ?
- ùn socu chè un suldatu. A rivoluzioni hè finita.
- Finita a mossa rivoluziunaria ? stridò Bentinck, veni di mova si in Auropa !

Isti parolli imprisiononu u cumandanti Poli. Si cheria chì raghjoni pudia avè di parlà cusì, un capimachja d'un armata di Cualizioni. Ma tinì a so parolla. U fattu chì Poli rifusessi, ùn ebbe colpa annantu a simpatia chì Bentinck li purtava. Prima di spicà si da l'ufficiali francesi, u ghjinirali inglesi li rigalò dui pistoli. Poli li dumandò par eddu, par a so moglia è par Anna Maria di signà li un lascià passà. A li feci è u li dedi. In più li prestò un bateddu di guerra inglesu par vultà in Aiacciu. U cumandanti è Anna maria partinu par l'Isula d'Elba.

Cristofanu Luzi, u 24.XI di u 2016